

## Žadanja na koalicijske jednanja

**W Braniborskej kaž tež w Sakskej jednaja SPD, CDU a Zeleni wo tym, wutworić nowu knježerstwowu koaliciju. Na předsydow a předsydki jich frakcijow, jednanskich nawodow a serbskopolitiskich akterow ma Serbski sejm wjacore žadanja, kotrež bě na njedawnym posedženju w Choćebuzu schwalił.**

**Choćebuz** (SN/at). Dalše wobchadženje ze zajimami Serbow, jich kulturna a kubłanska awtonomija, kompleksny rěčny wobłuk abo strukturna změna we Łužicy za dobu po kóncu wudobywanja a zmilinjenjenja brunicy su temowe čezišća žadanjow na koalicijske jednanja w Braniborskej a Sakskej.

Tři dypki měrja so eksplícitnje na Saksku. Tam měli podobny staw docpěć, kajkiž je w Braniborskej hižo zakonska norma. Serbski sejm sej žada, zo ma so Domowinje prawo skorženja w zmysle skórzbnego prawa zwjazkow (Verbandsklagerecht) přizwolić. Ewaluacija hornjoserbskeho šulstwa po braniborskim přikładze měła wuchadžišćo być za zhromadne konkluzije nastupajo skutkowne naprawy, serbsčinu zachować a wožiwić. Tež w Sakskej měli zastojnstwo krajneho społnomócnjenego za serbske naležnosće na runinje statneho sekretara zarjadować. W Drježdžanach a runje tak w Podstupimje měła funkcija w statnej kencliji zasydlena być.

Sejmarjo maja za trěbne, serbsčinu jako maćernu a druhu cuzu rěč na wšěch sakskich a braniborskich šulach połnje připóznać. Runje tak měłoj přichodnej knježerstwje směrodajny program „Europiski modelowy region – dwurěčna Łužica“ we wobłuku strukturneje změny podpěrać, a to z widom na změnu ciwilnotowaršnostnych strukturow po rezoluciji Zjednoćenych narodow 61/295.

Knježerstwje matej „při strukturneje změnje we Łužicy serbski lud zapřijeć a lěpšiny stejnišća z dwurěčnosće skrućić“. Serbski sejm wočakuje připóznaće jako swobodnje wuzwoleny gremij a jednanja z nim wo prašenjach kulturneje a kubłanskeje awtonomije Serbow kaž tež sobupostajowanje w regionalnym wuwicu. Naličene runje tak je, přihotować statne zrěčenje resp. dotalne wudospołnić, w kotrymž dźiwaja na přenjesenje kompetencow Serbskemu sejmej, zo by so nutřkowe samopostajowanje z kulturneje a kubłanskeje awtonomiju zeskutkowniło. W tym zwisku měli korporaciju zjawneho prawa Serbow wutworić.

## Mój wid: Swój hlós pozběhnyć

Jědnaće žadanjow pósła Serbski sejm stronam, kotrež w Braniborskej kaž tež w Sakskej wo tym jednaja nowe krajne knježerstwo wutworić. Podate su dypki, wurostowace z najnowšeho wuwica, ale tež tajke, z kotrymiž so hižo dlěje bědžimy. Skórzbnje prawo Domowinje jako zwjazkej słuša na adresu přichodnych sakskich koalicijskich partnerow runje tak k tomu kaž ewaluacija hornjoserbskeho rěčneho wukubłanja abo wutworjenje zastojnstwa knježerstwoweho społnomócnjenego za serbske naležnosće. Sejmarjo zasadžeja so za polěpšeny juristiski status Domowiny, zo móhła wona jako třěšny zwjazk zwoprawdženja w zakonjach zakótwjenych serbskich prawow dla tež skorzić. To je jasny wuraz akceptancy. Hač stej to strukturna abo klimowa změna, we Łužicy je serbski sydlenski rum – a tak wjetšinowa a mjeńšinowa ludnosć – wot wobeju potrjecheny. Tohodla dyrbja Serbja swój hlós pozběhnyć. Domowina je to ze swojimi wólbnyimi kopolakami činiła.

**Axel Arlt**